



HIDUPAN LIAR

Khazanah tak ternilai

Isu kepupusan hidupan liar di Malaysia bukanlah selalu menarik perhatian di negara ini. Namun, jika diteliti latar ceritanya, negara inilah syurga bagi hidupan liar memandangkan hutan hujan tropika di Malaysia bukan saja antara hutan hujan ter-tua di dunia, malahan menyediakan persekitaran habitat kesukaan binatang liar. Hidupan liar seperti harimau, gajah, badak sumbu dan orang utan kini antara spesies terancam di negara kita hari ini.

Berdasarkan jawapan bertulis daripada Menteri Sumber Asli dan Alam Sekitar pada 1 Julai 2014 di Parlimen, jumlah hidupan liar di seluruh negara, termasuk di Sabah dan Sarawak hari ini seperti gajah hanyalah tinggal sekitar 1,220 ekor, harimau belang (450), tapir (1,100), seladang (270), rusa sambar (700) dan burung upeh hanyalah kira-kira 10.

Statistik ini pastilah mengejutkan kita memandangkan hidupan liar ini spesies yang menjadi daya tarikan pelancongan daripada aspek ekopelancongan di Malaysia.

Selain itu, jumlah hidupan liar yang semakin mengelir ini juga dikatakan berpunca daripada permintaan tinggi terhadap binatang ini bagi makanan dan perubatan tradisional. Hal ini disebabkan peningkatan perdagangan haram dan penyeludupan hidupan liar yang menyumbang kepada permintaan tinggi bagi mendapatkan daging, tulang dan beberapa anggota badan lain hidupan liar ini.

Justeru itu, melalui Jabatan Perhilitan, kerajaan menggubal pelbagai perundangan dan tindakan drastik bagi menghalang penyeludupan hidupan liar ini ke luar negara, khususnya melalui jalan darat. Penggubalan undang-undang yang menepati piawaian antarabangsa seperti Akta Pemuliharaan Hidupan Liar 2010 dan Akta Perdagangan Antarabangsa Mengenai Spesies Terancam 2008 dikuatkuasakan dengan bantuan polis, imigresen, jabatan perhilitan dan sebagainya bagi menangani kegiatan peredaran hidupan liar yang semakin berleluasa.

Berdasarkan peruntukan seksyen 65, Akta Pemuliharaan Hidupan Liar 2010, mana-mana orang yang mengimport, mengeksport atau mengekspor semula mana-mana hidupan liar yang dilindungi tanpa suatu lesen maka seseorang itu sudah melakukan kesalahan yang boleh disabitkan tidak kurang daripada RM20,000 dan tidak lebih daripada RM50,000 dan dipenjarakan selama tempoh tidak melebihi satu tahun jika sabit kesalahan.

Di bawah peruntukan seksyen 10, Akta Perdagangan Antarabangsa mengenai Spesies Terancam 2008, mana-mana orang yang mengimport atau mengeksport mana-mana spesies terjadual tanpa permit seperti digazetkan di dalam jadual boleh dikenakan denda di antara RM100,000 hingga RM2 juta dan penjara tidak melebihi 7 tahun.

Walaupun kerajaan mempunyai perundangan bagi mengawal kegiatan ini, pada masa sama badan penguat kuasa turut menghadapi ancaman ugutan dan jenayah yang lain daripada pemburu haram ini. Ini diungkapkan sendiri Pengarah Eksekutif WWF Malaysia Datuk Dionysius Sharma, apabila mendapati banyak kes pemburu haram ini membawa senjata api haram tidak berlesen dan melakukan tindakan agresif terhadap pegawai hutan, pegawai jabatan Perhilitan dan renjer apabila cuba berhadapan dengan mereka.

Atas dasar itu, bantuan penguat kuasa lain seperti polis hutan dan tentera diperlukan bagi mengambil langkah yang lebih tegas dan serius untuk menanganinya. Pada masa yang sama, agensi Penguatkuasaan Maritim Malaysia juga diperlukan bantuannya bagi menghalang penyeludupan dari jalan laut. Usaha bersepadu sebegini sekurangkungannya akan memperkukuhkan gerak kerja dalam usaha menangani penyeludupan hidupan liar di Malaysia.

Selain itu, jika bersandarkan perundangan yang ada di atas pastilah kita memahami kerajaan sudah cuba memastikan setiap jenayah membabitkan hidupan liar ini diambil tindakan sewajarnya terhadap penjenayahnya. Namun begitu, pada masa yang sama dorongan untuk melakukan jenayah ini tidak mungkin berlaku jika tiada permintaan tinggi dalam kalangan masyarakat untuk menjadikan ia sebagai hidangan eksotik dan sebagainya.

Kesedaran masyarakat dengan memberikan pencerahan berhubung hidupan liar ini perlu dilakukan dengan paparan statistik jumlah spesies yang terancam dan perundangan yang ada perlu agar faham bahawa binatang ini perlu dipulihara jumlahnya. Bayangkan saja jika langkah pendidikan sebegini tidak diambil, berkemungkinan besar 10 hingga 15 tahun lagi

generasi masa depan Malaysia sudah tidak mampu melihat kekayaan khazanah alam seperti flora dan fauna ini di dalam hutan mahupun di zoo. Mungkin yang tinggal melalui gambar sebagai bukti hidupan liar ini pernah hidup di Malaysia.

Dengan sebab itulah kesedaran sebegini penting bagi menjadi titik permulaan untuk masyarakat bekerjasama dengan agensi kerajaan menangani, sekali gus membanteras jenayah penyeludupan haram ini. Usaha membanteras jenayah ini tidaklah boleh diletakkan di bahu pihak penguatkuasaan semata-mata. Kerjasama sebegini sebenarnya menghasilkan kejayaan besar dalam operasi membanteras penyeludupan hidupan liar apabila berdasarkan

Rekod Jabatan Perhilitan di antara 2001 hingga 2013, 463 kes penyeludupan hidupan liar berjaya ditumpaskan atas kerjasama kerajaan dan masyarakat.

Selain menggubal perundangan bagi membanteras jenayah ini, kerajaan melalui Kementerian Sumber Asli dan Alam Sekitar juga menerima peruntukan sebanyak RM33.1 juta bagi pembangunan dan program konservasi hidupan liar. Kewujudan dana ini membolehkannya diagihkan kepada konservasi hidupan liar seperti konservasi spesies harimau belang (RM1.08 juta), gajah (RM15 juta) dan lain-lain (RM18.1 juta).

Memandangkan hidupan liar ini semakin pupus maka kerajaan mengambil inisiatif menyediakan 'habitat' sementara bagi menyelamatkan binatang ini buat sementara waktu sebelum dibebaskan semula ke dalam hutan apabila dewasa.

Ketika ini kerajaan menyediakan beberapa tempat konservasi binatang seperti penyu, gajah, orang utan, badak sumbu dan sebagainya. Kewujudan pusat konservasi di sesetengah negeri kini menjadi destinasi pelancongan dan pendidikan bagi pengunjung yang berminat. Ini termasuklah Pusat Rehabilitasi Orang Utan Sepilok, Sandakan yang bukan saja berjaya menyelamatkan begitu banyak spesies orang utan, malah kini dikenali di rantau Asia Tenggara antara pusat rehabilitasi orang utan yang berjaya.

FAKTA
Kementerian Sumber Asli dan Alam Sekitar terima peruntukan RM33.1 juta bagi pembangunan dan konservasi hidupan liar

Faktor permintaan

Pemulis sedang melanjutkan pengajian pada peringkat PhD dalam Undang-Undang Perlembagaan di Fakulti Undang-undang, UKM